



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ք. Երևան

22.04.2021թ.

Ո Ր Ո Շ ՈՒ Մ
ՀՀ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ
ՔՆՆՈՂ ԱՆՁԻ
թիվ ԱՑ-ԼՕ-2021/76

Նախագահությամբ՝ ՀՀ գնումների հետ կապված բողոքներ քննող անձ Լ. Օհանյանի
Քարտուղարությամբ՝ Լ. Անանիկյանի

Պատվիրատու՝ Հայաստանի տարածքային զարգացման հիմնադրամ
Մասնակից՝ «ԳԵՎ ԷԼԼ ՊԼԱՏ» ՍՊԸ

Գնման ընթացակարգի ծածկագիրը և առարկան՝
«ՀԾ-ԳՀ-ԱՇՁԲ-2019/43» ծածկագրով գնանշման հարցման ընթացակարգ,
վերանորոգման և ջեռուցման աշխատանքների ձեռքբերում

ՀՀ գնումների հետ կապված բողոքներ քննող անձը (այսուհետ նաև՝ Բողոքներ
քննող անձ)՝ ուսումնասիրելով Հայաստանի Հանրապետության ֆինանսների
նախարարության կողմից 23.03.2021թ.-ի թիվ 26/26-1/4283-2021 գրությամբ «ԳԵՎ ԷԼԼ
ՊԼԱՏ» ՍՊԸ-ին (այսուհետ նաև՝ Մասնակից) գնումների գործընթացին մասնակցելու
իրավունք չունեցող մասնակիցների ցուցակում ներառելու նպատակով նախաձեռնված
ընթացակարգով ներկայացված հիմքերը,

Պ Ա Ր Զ Ե Ց

1. Գործի նախապատմությունը

ՀՀ ֆինանսների նախարարությունը, Հայաստանի տարածքային զարգացման հիմնադրամի 17.03.2021թ.-ի թիվ Ե/01/413-21 գրության հիման վրա, 23.03.2021թ.-ին «ԳԵՎ ԷԼԼ ՊԼԱՏ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնել է ընթացակարգ՝ Բողոքներ քննող անձին ներկայացնելով համապատասխան հիմքերը:

Բողոքներ քննող անձի գործը մակագրվել է 23.03.2021թ.-ին:

23.03.2021թ.-ին www.gnumner.am կայքում հրապարակված հայտարարությամբ գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը ընդունվել է վարույթ և տրվել է թիվ ՍՑ-ԼՕ-2021/76 համարի ծածկագիրը:

31.03.2021թ.-ին և 22.04.2021թ.-ին նշանակվել և հրավիրվել են նիստեր:

Գործի քննությունն ավարտվել է 31.03.2021թ.-ին և Բողոքներ քննող անձի որոշման հրապարակման օր է նշանակվել 22.04.2021թ.-ին:

2. Հայաստանի տարածքային զարգացման հիմնադրամի ներկայացրած փաստերը և դիրքորոշումը.

Հայաստանի տարածքային զարգացման հիմնադրամը 17.03.2021թ.-ի թիվ Ե/01/413-21 գրությամբ դիմել է ՀՀ ֆինանսների նախարարությանը՝ հայտնելով հետևյալը.

«Հայաստանի տարածքային զարգացման հիմնադրամը «ԳԵՎ ԷԼԼ ՊԼԱՏ» ՍՊԸ-ի հետ 2019թ. ապրիլի 05-ին կնքել է «ՀՀ Սյունիքի մարզի Գորիս քաղաքի թիվ 5 դպրոցի մարզադահլիճի վերանորոգում և ջեռուցում» պետության կարիքների համար կապալային աշխատանքների կատարման պետական գնման NՀԾ-ԳՀ-ԱՇՁԲ-2019/43 պայմանագիրը: Պայմանագրով նախատեսված աշխատանքների կատարման ժամկետը 130 օր էր: Շինարարական աշխատանքների մեկնարկը տրված էր 2019թ. մայիսի 13-ին, ավարտը նախատեսված էր 2019թ. սեպտեմբերի 20-ին: Հետագայում, կողմերի միջև 2019թ. սեպտեմբերի 20-ին կնքված Համաձայնագիր 2-ով, Պայմանագրի ժամկետը երկարաձգվել է մինչև 2019թ. Հոկտեմբերի 20-ը: Սակայն, փաստացի շինարարական աշխատանքները սահմանված ժամկետում չեն ավարտվել:

Հաշվի առնելով այն հանգամանքը, որ NՀԾ-ԳՀ-ԱՇՁԲ-2019/43 Պայմանագրով նախատեսված շինարարական աշխատանքները ժամանակին չեն ավարտվել և դրանց

ընթացքի մասին Պարվիրատուի կողմից 22.05.20-ին ներկայացվել է համապատասխան գրություն, ինչպես նաև այն, որ մինչև Պայմանագրով նախատեսված շինարարական աշխատանքների ավարտը իրականացվել է նախատեսված աշխատանքների 84 տոկոսը, որի համար Կապալառուին 2019թ. ընթացքում վճարվել է 17,522,342 դրամ, և հիմք ընդունելով ՀԾ-ԳՀ-ԱՇՁԲ-2019/43 պայմանագրի 3.3 կետի 3.1.4 (բ) ենթակետի և 6.3 կետի դրույթները կայացվել է որոշում լուծել թիվ NՀԾ-ԳՀ-ԱՇՁԲ-2019/43 պայմանագիրը, որի մասին ծանուցումն ուղարկվել է «ԳԵՎ ԷԼԼ ՊԼԱՏ» ՍՊԸ-ի էլեկտրոնային փոստին և հրապարակվել պաշտոնական տեղեկագրում:

Հաշվի առնելով վերոգրյալը, և համաձայն «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի՝ խնդրում ենք Ձեր հանձնարարականը համապատասխան ստորաբաժանմանը սկսել գործընթաց «ԳԵՎ ԷԼԼ ՊԼԱՏ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու համար:»:

Ելնելով վերոգրյալից և հիմք ընդունելով ՀՀ կառավարության 04.05.2017թ.-ի թիվ 526-Ն որոշմամբ հաստատված գնումների գործընթացի կազմակերպման կարգի 45-րդ կետի պահանջները, կից ներկայացվել է «ՀԾ-ԳՀ-ԱՇՁԲ-2019/43» ծածկագրով հայտարարված գնման ընթացակարգի շրջանակներում «ԳԵՎ ԷԼԼ ՊԼԱՏ» ՍՊԸ-ի տվյալները՝ համապատասխան հիմքերով:

3. «ԳԵՎ ԷԼԼ ՊԼԱՏ» ՍՊԸ-ի ներկայացրած փաստարկները և դիրքորոշումը.

Բողոքներ քննող անձը 23.03.2021թ.-ի գրությամբ դիմել է «ԳԵՎ ԷԼԼ ՊԼԱՏ» ՍՊԸ-ին՝ հնարավորություն տալով ՀՀ ֆինանսների նախարարության կողմից 23.03.2021թ.-ի թիվ 26/26-1/4283-2021 գրությամբ նախաձեռնված ընթացակարգի վերաբերյալ ներկայացնել գրավոր կարծիք:

Մասնակիցը, ստանալով կարծիք հայտնելու վերաբերյալ գրությունը, ինչպես նաև ծանուցված լինելով հրավիրված նիստերի տեղի, օրվա և ժամի մասին, չի ներկայացել հրավիրված նիստերին՝ չներկայացնելով նախաձեռնված ընթացակարգի վերաբերյալ գրավոր դիրքորոշում:

4. ՍՑ-ԼՕ-2021/76 ընթացակարգի քննության համար էական նշանակություն ունեցող փաստերը.

Սույն գործի քննության համար էական նշանակություն ունեցող փաստերի համաձայն՝

i. Հայաստանի տարածքային զարգացման հիմնադրամի (այսուհետ նաև՝ Պատվիրատու) և «ԳԵՎ ԷԼԼ ՊԼԱՏ» ՍՊԸ-ի միջև 01.04.2019թ.-ին կնքվել է թիվ «ՀԾ-ԳՀ-ԱՇՁԲ-2019/43» ծածկագրով պետական գնման պայմանագիր (այսուհետ նաև՝ Պայմանագիր):

ii. Պայմանագրի 1.1 կետի համաձայն՝ Կապալառուն պարտավորվում է սույն պայմանագրով սահմանված կարգով, նախատեսված ծավալներով, ձևով և ժամկետներում կատարել պայմանագրի թիվ 1 հավելվածով սահմանված ծավալաթերթ-նախահաշվով նախատեղված «ՀՀ Սյունիք մարզի Գորիս քաղաքի թիվ 5 դպրոցի մարզադահլիճի վերանորոգում և ջեռուցում» աշխատանքները, իսկ Պատվիրատուն պարտավորվում է ընդունել կատարված աշխատանքը և վարձատրել դրա դիմաց:

iii. Պայմանագրի հավելված 2-ով սահմանված օրացույցային գրաֆիկի համաձայն՝ աշխատանքների կատարումը պետք է իրականացվի, պայմանագրով սահմանված աշխատանքների տեխնիկական հսկողության պայմանագրի ուժի մեջ մտնելու պահից սկսված՝ 130 օրվա ընթացքում:

iv. Պատվիրատուի և «ԳԵՎ ԷԼԼ ՊԼԱՏ» ՍՊԸ-ի միջև 20.09.2019թ.-ին կնքվել է թիվ «ՀԾ-ԳՀ-ԱՇՁԲ-2019/43» ծածկագրով պետական գնման պայմանագրի թիվ 2 Համաձայնագիրը (այսուհետ նաև՝ Համաձայնագիր):

v. Համաձայնագրի հավելված 1-ով սահմանված օրացույցային գրաֆիկի համաձայն՝ աշխատանքների կատարումը պետք է սկսվի 13.05.2019թ.-ին և իրականացվի 160 օրվա ընթացքում:

vi. www.gnumner.am համացանցային կայքում՝ «Պայմանագրերը միակողմանիորեն լուծելու մասին ծանուցումներ» բաժնում, 02.03.2021թ.-ին հրապարակված պայմանագրի միակողմանի լուծման մասին ծանուցման համաձայն՝ Հայաստանի տարածքային զարգացման հիմնադրամը «ԳԵՎ ԷԼԼ ՊԼԱՏ» ՍՊԸ-ի հետ 2019թ. ապրիլի 05-ին կնքել է «ՀՀ Սյունիքի մարզի Գորիս քաղաքի թիվ 5 դպրոցի մարզադահլիճի վերանորոգում և ջեռուցում» պետության կարիքների համար կապալային աշխատանքների կատարման պետական գնման NՀԾ-ԳՀ-ԱՇՁԲ-2019/43 պայմանագիրը: Պայմանագրի կատարման ժամկետ էր սահմանվել 130 օր: Շինարարական աշխատանքների մեկնարկը տրված էր 2019թ. մայիսի 13-ին, ավարտը նախատեսված էր 2019թ. սեպտեմբերի 20-ին: Հետագայում, կողմերի միջև 2019թ. սեպտեմբերի 20-ին

կնքված Համաձայնագիր 2-ով, Պայմանագրի ժամկետը երկարաձգվել է մինչև 2019թ. հոկտեմբերի 20-ը: Սակայն, փաստացի շինարարական աշխատանքները մինչ օրս ավարտված չեն:

vii. Հայաստանի տարածքային զարգացման հիմնադրամը Մասնակցի տվյալները՝ համապատասխան հիմքերով, ՀՀ ֆինանսների նախարարությանն է ներկայացրել 17.03.2021թ.-ի թիվ Ե/01/413-21 գրությամբ:

5. Բողոքներ քննող անձի հիմնավորումները և եզրահանգումը.

Բողոքներ քննող անձը լրիվ, օբյեկտիվ և բազմակողմանի հետազոտելով և գնահատելով սույն գործում առկա ապացույցները, և համադրելով դրանք գործով պարզված փաստական հանգամանքների հետ, հանգում է այն եզրակացության, որ ՀՀ ֆինանսների նախարարության կողմից 23.03.2021թ.-ի թիվ 26/26-1/4283-2021 գրությամբ «ԳԵՎ ԷԼԼ ՊԼԱՏ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգն ենթակա է մերժման, հետևյալ պատճառաբանությամբ.

«Գնումների մասին» ՀՀ օրենքի (այսուհետ նաև՝ Օրենք) 6-րդ հոդվածի 1-ին մասի 6-րդ կետի «ա» և «բ» ենթակետերի համաձայն՝ ... մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը, և որպես ընտրված մասնակից հրաժարվել է պայմանագիր կնքելուց:

ՀՀ կառավարության 04.05.2017թ.-ի թիվ 526-Ն որոշմամբ հաստատված «Գնումների գործընթացի կազմակերպման» կարգի (այսուհետ նաև՝ Կարգ) 45-րդ կետի համաձայն՝ Օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում պատվիրատուն տվյալ մասնակցի տվյալները՝ համապատասխան հիմքերով, գրավոր ուղարկում է լիազորված մարմին, որը դրանք ստանալուն հաջորդող 5 աշխատանքային օրվա ընթացքում նախաձեռնում է տվյալ մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

Սույն գործի փաստերի համաձայն՝ Հայաստանի տարածքային զարգացման հիմնադրամի և «ԳԵՎ ԷԼԼ ՊԼԱՏ» ՍՊԸ-ի միջև 01.04.2021թ.-ին կնքված թիվ «ՀԾ-ԳՀ-ԱՇՁԲ-2019/43» ծածկագրով պետական գնման պայմանագրի հավելված 2-ով սահմանված օրացույցային գրաֆիկի համաձայն՝ աշխատանքների կատարումը պետք է իրականացվի, պայմանագրով սահմանված աշխատանքների տեխնիկական հսկողության պայմանագրի ուժի մեջ մտնելու պահից սկսված՝ 130 օրվա ընթացքում:

Պատվիրատուի և «ԳԵՎ ԷԼԼ ՊԼԱՏ» ՍՊԸ-ի միջև 20.09.2019թ.-ին կնքված թիվ «ՀԾ-ԳՀ-ԱՇՁԲ-2019/43» ծածկագրով պետական գնման պայմանագրի թիվ 2 Համաձայնագրի հավելված 1-ով սահմանված օրացույցային գրաֆիկի համաձայն՝ աշխատանքների կատարումը պետք է սկսվեր 13.05.2019թ.-ից և իրականացվեր 160 օրվա ընթացքում:

www.gnumner.am համացանցային կայքում՝ «Պայմանագրերը միակողմանի լուծելու մասին ծանուցումներ» բաժնում 02.03.2021թ.-ին հրապարակված պայմանագրի միակողմանի լուծման մասին ծանուցման համաձայն՝ Հայաստանի տարածքային զարգացման հիմնադրամը «ԳԵՎ ԷԼԼ ՊԼԱՏ» ՍՊԸ –ի հետ 2019թ. ապրիլի 05-ին կնքել է «ՀՀ Սյունիքի մարզի Գորիս քաղաքի թիվ 5 դպրոցի մարզադահլիճի վերանորոգում և ջեռուցում» պետության կարիքների համար կապալային աշխատանքների կատարման պետական գնման NՀԾ-ԳՀ-ԱՇՁԲ-2019/43 պայմանագիրը: Պայմանագրի կատարման ժամկետ էր սահմանվել 130 օր: Շինարարական աշխատանքների մեկնարկը տրված էր 2019թ. մայիսի 13-ին, ավարտը նախատեսված էր 2019թ. սեպտեմբերի 20-ին: Հետագայում, կողմերի միջև 2019թ. սեպտեմբերի 20-ին կնքված Համաձայնագիր 2-ով, Պայմանագրի ժամկետը երկարաձգվել է մինչև 2019թ. հոկտեմբերի 20-ը: Սակայն, փաստացի շինարարական աշխատանքները մինչ օրս ավարտված չեն:

Հայաստանի տարածքային զարգացման հիմնադրամը Մասնակցի տվյալները՝ համապատասխան հիմքերով, ՀՀ ֆինանսների նախարարությանն է ներկայացրել 17.03.2021թ.-ի թիվ Ե/01/413-21 գրությամբ՝ Կարգի 45-րդ կետով սահմանված 5 աշխատանքային օրյա ժամկետի խախտմամբ:

Վերոգրյալ իրավական նորմերի և փաստական հանգամանքների համադրման արդյունքում, Բողոքներ քննող անձը հաստատված է համարում, որ Օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ են եկել 02.03.2021թ.-ին՝ պայմանագրի միակողմանի լուծման մասին ծանուցումը հրապարակելու հիմքով, սակայն Հայաստանի տարածքային զարգացման հիմնադրամը Մասնակցի տվյալները՝

համապատասխան հիմքերով, ՀՀ ֆինանսների նախարարությանն է ներկայացրել 17.03.2021թ.-ի թիվ Ե/01/413-21 գրությամբ՝ Կարգի 45-րդ կետով սահմանված 5 աշխատանքային օրյա ժամկետի խախտմամբ:

«Նորմատիվ իրավական ակտերի մասին» ՀՀ օրենքի 41-րդ հոդվածի 1-ին մասի համաձայն՝ նորմատիվ իրավական ակտի նորմը մեկնաբանվում է՝ հաշվի առնելով նորմատիվ իրավական ակտն ընդունելիս այն ընդունող մարմնի նպատակը՝ ելնելով դրանում պարունակվող բառերի և արտահայտությունների տառացի նշանակությունից, ամբողջ հոդվածի, գլխի, բաժնի կարգավորման համատեքստից, այն նորմատիվ իրավական ակտի դրույթներից, ի կատարումն որի ընդունվել է այդ ակտը, տվյալ նորմատիվ իրավական ակտով սահմանված սկզբունքներից, իսկ այդպիսի սկզբունքներ սահմանված չլինելու դեպքում՝ տվյալ իրավահարաբերությունը կարգավորող իրավունքի ճյուղի սկզբունքներից:

Ամբողջացնելով վերը թվարկված իրավական նորմերը, դրանց և գործում առկա փաստերի համադրման արդյունքում, Բողոքներ քննող անձը հանգում է այն եզրակացության, որ Օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում մասնակցի տվյալները՝ համապատասխան հիմքերով, լիազորված մարմնին ուղարկելը Պատվիրատուի պարտականությունն է, այն իմպերատիվ (պարտադիր) դրույթ է, որի պահպանմամբ է միայն հնարավոր փաստել իրավահարաբերության առաջացումը:

Հակառակ դեպքում Կարգի 45-րդ կետով սահմանված դրույթները չեն ծառայի իրենց նպատակին, այլակերպ մեկնաբանման դեպքում կհանգեցնեն որևէ ողջամիտ իրավական փաստարկով չհիմնավորվող մեկնաբանության՝ հաշվի չառնելով այն ընդունող մարմնի նպատակը, նորմում պարունակվող բառերի և արտահայտությունների տառացի նշանակությունը:

ՀՀ վճռաբեկ դատարանն իր նախկինում կայացված որոշումներից մեկով կարևորել է, որ Հայաստանի Հանրապետության՝ որպես իրավական պետության կարևորագույն հատկանիշ է այն, որ սահմանադրական մակարդակով պետությունը հավաստում է իր հավատարմությունն այդ տեսությանը, ճանաչում և ամրագրում է իր կախվածությունն իրավունքից, իրավունքի գերակայությունը՝ պետական իշխանության նկատմամբ: Իրավական պետության և իրավունքի գերակայության սկզբունքը, ի թիվս այլոց, դրսևորվում է նրանում, որ Հայաստանի Հանրապետությունը որդեգրել է մարդու և քաղաքացու հիմնական իրավունքների և ազատությունների՝ որպես անմիջականորեն

գործող իրավունք լինելու գաղափարը: Այն իր արտացոլումն է գտել նաև 2015 թվականի փոփոխություններով ՀՀ Սահմանադրության 5-րդ (Իրավական նորմերի աստիճանակարգությունը) և 6-րդ (Օրինականության սկզբունքը) հոդվածներում՝ մասնավորապես ամրագրելով, որ Սահմանադրությունն ունի բարձրագույն իրավաբանական ուժ, և որ **պետական և տեղական ինքնակառավարման մարմիններն ու պաշտոնատար անձինք իրավասու են կատարելու միայն այնպիսի գործողություններ, որոնց համար լիազորված են Սահմանադրությամբ կամ օրենքներով** (տե՛ս, «ՎՏԲ-Հայաստան քանկ» ՍՊԸ-ն ընդդեմ էդիկ Հակոբյանի թիվ ԼԴ/0509/02/13 քաղաքացիական գործով ՀՀ վճարելի դատարանի 12.07.2018 թվականի որոշումը):

Ընդ որում, պետաիշխանական լիազորություններով օժտված ցանկացած մարմնին, իր գործառնական կարգավիճակին համապատասխան, օրենքով և նորմատիվ իրավական ակտերով կարող են վերապահվել ինչպես պարտադիր, այնպես էլ հայեցողական լիազորություններ՝ պայմանավորված սահմանադրաիրավական այն հիմնադրույթի իրացման անհրաժեշտությամբ, ըստ որի՝ պետական և տեղական ինքնակառավարման մարմիններն ու պաշտոնատար անձինք իրավասու են կատարելու միայն այնպիսի գործողություններ, որոնց համար լիազորված են Սահմանադրությամբ կամ օրենքներով, չպետք է հակասեն և պետք է համապատասխանեն Սահմանադրությանը, օրենքներին կամ նորմատիվ իրավական ակտերին:

Այսպիսով, վերոհիշյալ փաստական հանգամանքների և իրավական նորմերի լույսի ներքո, դրանց համակարգված վերլուծության արդյունքում, Բողոքներ քննող անձը հանգում է այն եզրակացության, որ Պատվիրատուի կողմից չի պահպանվել Կարգի 45-րդ կետի դրույթներով սահմանված իմպերատիվ (պարտադիր) դրույթները, քանի որ, ինչպես վերը նշվեց, Կարգի 45-րդ կետի պահպանմամբ է միայն հնարավոր փաստել գնումների գործընթացին մասնակցելու իրավունք չունեցող մասնակիցների ցուցակում ներառելու իրավահարաբերության առկայությունը և դրանից հետո նոր միայն ըստ էության անդրադառնալ Պատվիրատուի կողմից ներկայացված Օրենքի 6-րդ հոդվածի 1-ին մասի 6-րդ կետով նախատեսված համապատասխան հիմքերի օրինաչափությանը: Այլ կերպ ասած՝ մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու Ընթացակարգի քննությունը, Կարգի 45-րդ կետով սահմանված ժամկետների խախտման արդյունքում, սահմանափակվում է ընթացակարգային նորմերի կիրառմամբ:

Վերոնշյալներով պայմանավորված՝ «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետում նշված պատասխանատվությունը չի կարող վրա հասնել ու հանգեցնել Մասնակցին՝ գնումների գործընթացին մասնակցելու իրավունք չունեցող մասնակիցների ցուցակում ընդգրկելուն:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով՝ ՀՀ գնումների հետ կապված բողոքներ քննող անձը.

Ո Ր Ո Շ Ե Ց

ՀՀ ֆինանսների նախարարության կողմից 23.03.2021թ.-ի թիվ 26/26-1/4283-2021 գրությամբ «ԳԵՎ ԷԼԼ ՊԼԱՏ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված թիվ ՍՑ-ԼՕ-2021/76 ծածկագրով ընթացակարգը մերժել:

ՀՀ գնումների հետ կապված բողոքներ քննող անձի ընդունած որոշումն ուժի մեջ է մտնում այն տեղեկագրում հրապարակելուն հաջորդող օրը:

ՀՀ գնումների հետ կապված բողոքներ քննող անձի ընդունած որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**ՀՀ ԳՆՈՒՄՆԵՐԻ ՀԵՏ ԿԱՊՎԱԾ
ԲՈՂՈՔՆԵՐ ՔՆՆՈՂ ԱՆԶ՝**



ԼԵՎՈՆ ՕՇԱՆՅԱՆ